

Fasnacht Visp, 30. – 31. Januar 2016

SAMSTAG

Am Samschti am Morge hei mir üs am haubi 9ni zum Schminke troffe. Wie immer hei töu besser oder weniger guet usgseh. Erschtens isches chli früech gsi und zwöitens isch am obe vorhär Friti gsi. ☺ Nichts desto trotz hei mir aui dr Chopf müesse häre ha für das s Schminke team aune het chönne "glanz" is gsicht zoubere. Und hei sogar der Däääster het chli Glizer im Gsicht gha. ☺

Nachem Schninke si mir du uf Huttu id Ribimatte und hei der ufe Car gwartet. Auso uf chliin Car auso uf s Büssli. Naja die Zyte vom Car si chli verbi, da mir jo nüm so e grossi Tschuppele si aber ou mit däm isches gange. Aues ilade, Ahänger dra und los geits. Dr Ruedi het üs schön Begrüesst, dr MINI-CAR het auso ou es Mikrophon obschon das scho chli überflüssig isch... S Möneli het ihres Megaphon nid derbi gha aber s Mikrophon ou nid brucht. Si het jo es luts Organ. ☺ Jo ize simer auso chli ungerwägs gsi. Mir hets fasch dr Gring verjagt, ha i doch Chopfweh gha nüt schöners. Eifach so plötzlich, churz nachdäm mir los gfahre si. Weiss auso nid vo was das i das ha gha, ha aber e Vermuetig. Super Chopfwehtableette hingerinne. Ok i muess mi lide.

Mir hei äbe dür das ou nid e so gsunge wie ou scho. Und irgendwie singt äüä süsch niemmer gärn we ig nid hüufe?! ☺

Guete Kanderstäg verlade. Nachem Tunu hei mir du fescht gstöut, dass mir no chli früech dranne si. Auso heimer irgendwo vor Visp e Rouchpouse igleit. Wieso si mir eigentlich aui uf mini Crocs gstange dert? Die si schön grünen bequem und scho 10 Jährig. Egau när simer uf Visp a Bahnhof gfahre und hei dert uf üse Götti, dr Frederic gwartet. Är isch du auso o fasch pünktlich cho. Aber d Sunne het gschune und de isch s warte nid so schlimm gsi. Ä het üs du när no zum ne Apèro iglade. Auso öppis z trinke im Eilverfahren. Jo 20 min. si hat scho grad chli churz für nes Getränk abezläre. Aber isch jo gsponseret gsi.

Nächär si mir wider i Wii-Chäuer vo Schnidrigs wie scho letscht johr. Eifach o wider ohni Singe. Tja irgendwie simer das Johr nid so singig. Es het dert es feins Glas Wii gäh und Wurst mit Brot, Chips Kafi Schnapps wär het wöue. Es isch auso schön dert. Mir hei när aus Dank verusse no hurti es paar Liedli gspiut. Uf dr Stäge het auso no komisch tönt da mir süsch nid so stöh. Aber es isch gange.

Nächär si mir go Znacht ässe id Brasseri oder so. Es het du no bau es Poulet-Gstürm gäh. Auso jo vo wäge: „I cha das nid ässe wens no a de Chnoche hanget...“ oder „Cha ig nume Pommes ha ohni Vogu?“ Heieiei es hei sich aui chönne mäude was si gärn hätte und die wos haut nid gseit hei hei eifach huat es Poulet übercho. Egau z letscht use hei ömu du aui öppis z ässe gha. S Rebbie isch die erschti Poulet-Filettierere gsi oder so und es si diversi Täuer witergreicht worde, da nachem Apèro dr Hunger nüm so gross isch gsi.

Mir hei ir Beiz womer gässe hei no eis zwöi drü Liedli zum Beschte gäh.

„Eifach nid z lut gäuit mir si dinne“ I würd säge probiere chame jo mou... ☺ und siehe da es geht.

Jo nächär si mir richtig Umzugsstart gäge Bahnhof abe glüffe. Dert heimer no es Wiili müesse warte. När hets afo lufte isch früsch worder und gli mou isch du dr Räge cho. Es hät nid grad müesse räge aber wenn me das nid ma verliede isch me ar Fasnacht fautsch. ☺

I weiss nüm weles Nr. Dasmer am Samsti Obe si gsi aber I gloube öppe so ir Mitti. Dru Umzug isch eigentlich nid so läng. Aber sehr Konfetti-riich und när dä blöd huere Schlaberspräy. Das geit jo gar nid!! Mit Steine heisi schiins o no umegschosse was ig aber nid gmerkt ha. I ha meh ä Kampf gha mit Konfetti nid z schlücke und Schlabber-Spräy usem Chopf s wüsche. Es isch eifach scho abartig wie das cha fröid mache öpperem wo musig macht, Konfetti azschiess. Egau dr Umzug isch düre gsi. Im Summer hets Meitschi ABBA ä Session... Fasch gar bis ufs Meitschi heimer auso aui Lieder gspiut wie gäng eigentlich. Ah jo dr Lion no dr Lion. Schad muesi dert überhopt öppis drücke süsch wär das es Finger-entspannends-Lied. ☺

Mir hei du es Instrumänte-Depot gmacht und si no chli go Umzug luege. Mir hei user durchsichtige Sexy Pellerine gsattlet und hü. Es muesst würrklich nid rägne... ☹

Mir si när gäge Bahnhof abe disloziert, da mir dert üse nöchsch Uftritt hei gha. Zersch si aber no d Fleigutätscher dranne gsi. Die spiele äbe scho cooli Lieder. Und ar Lies ihres Lieblingslied isch ou cho. Si het auso müesse abgrüppele so schön isch das Lied. IZ WEISI WIESO DAS DR WIIS PÖUTZ AM MANTU VOM TAMPI NÜM WISS ISCH... ☺

Jo när si mir dra cho. Mir hei aues gäh und de lüt hets gloub o gfaue. Mir si ömu grüemt worde, das mir scho es riisigs Volume he für söfu weni Lüt. Und mir heigi d Stück aui schön arrangiert für nid meh. Jo Block 1 hätti mir ize o scho mou gspiut. Auso e abkürzti Version aber egau mir hei o nume 15min. zyt gha. Cooli Sach i liebe Block 1! ☺

Jo 1. Uftritt düre und witer zum La Poste. Dert heimer üse nöchsch Uftritt gha.

Ize isch dr Block 2 dra cho oder so. I gloube dr Schröders heimer nie gspiut? Derfür dr Lion öppe 5x... Guet isch jo ä Biz wit e ligang. ☺ Ou dä Uftritt isch guet gsi. So wini gseh ha hei d Lüt ziemlich mit gmacht. Isch aber no schwirig, da im Zäut näbe dranne Musig glüffe isch und i meischtens anstatt dr Däster, dr Bass vor Musig im Zäut ghört ha und das isch e huere Sch***** zum spile. Aber süsch isch das super gsi. Jo das wärs gsi für dä obe. Meh uftritte heimer nüme gha. Am Sunndi de wider.

Mir si aui Zäme schööön im 2er Reiheli gäge Instrumänteahänger glüffe. Ah jo das heimer am Nomittag o scho mou gmacht und im Verkehrsgarte no chli Outo gspiut. Isch auso luschtig gsi. Dr Böffi hets gfüumet. Auso wenss öpper interessiert fragetne nachem Video. ☺
Äbe mir si aui go d Instrumänt versorge und när si töu no mou zrugg ufe Chöifplatz oder ines Pub, Bar Beiz oder was o immer und angeri si is Bett. Und töu si dür ganz Visp abglüfe a Bahnhof und hei es Taxi gno für is Jodernheim. Ufeloufe wär gloub schnöuer gange. Vorauem bis no am Bahnhof nide bisch wärsch 2x zu de Nonne glüffe. Aber egau muess jede säuber wüsse. Aber erwähne hanis fasch müesse.

SONNTAG

Nach längere Bettrüeh oder o chürzere isch am Sunndi morge am haubi 9ni wider schminke ufem Programm gstange. Töu hei scho widersuper, no nid ganz oder u huere leid usgseh. Je nach däm was me nächti no gmacht het gha.

Dr Böffi het no es Pistoleproblem gha, das aber när chönne löse. När hei aui schön s Chöppli häre gha und nachem Schminke si mir go packe und mitem Car wider zu de Instrumänt gfare. Aus schön uspackt und när wider richtig Chöifplatz glüffe.

Hmmmm.... Mir si äüä no chli früech?? Es git no ke Bier und lüt si o no nid so viu ume. Aber easy es het jo e Kebap-Lade oder so wo sicher e Dose Bier het. Ig u d Lies sie abgeschliche, was dr Dani natürlich gseh het und isch ou no hingernoche cho wie die auti Isebahn. D Lies isch ine go Bier choufe. Si heig e Notfau het si zum Pizzabecker gseit. Är so jä was de für eine. Sie so, Jo si müess Bier ha. Är so, Dose oder Fass? Sie so, Dosä längt. ☺

Jo Dosä oder Fass es Fass wär äüä o guet gsi aber mir hei üs du für ne Dosä entschide.

När si du gli mou d Fleigutätscher igmarschiert uf d Bühni glüffe und he es paar Lieder zum Beschte gäh. Mir natürlich wie mir si es huere Chäferfest gha.

Plötzlich dr Böffi so, he wüsster was us Teig isch und mega verbrucht usgseht? Ä FIGG-DI-BÄNZ.

Meh isch do derzue nüme z säge. ☺ Guet dä F-Di-Bänz isch när de dr ganz Tag immer wider füre cho. Wie chönnts ou anders si bi üs.

Wo du d Fleigutätscher fertig si gsi hei mir no üse Uftritt gha. Dä isch auso super gsi. Ömu mi hets so düecht. Und wie chönnts ou anders si mir hets wider mou d Lippe verjagt und mis Naselümpli het auso usgseh wie wenn me es Söili gschlachtet hät. Aber das isch eigentlich aube nid so schlimm wies usgseht.

Jo nachem Uftritt hei die meischte Hunger gha. Töu si i Mäc, die angere hei dr Bon brucht und de si paar gloub no id Pizzeria.

Jo es chliners Grüppeli vo üs isch richtig Bahnhof abe glüffe, da mir de när a Umzug müesse hei. Ufem wäg abe si paar Fleigutätscher am Schärme gstange. Und de hei mir mit dene chli dumm Gschnurrert. Dr Lies-Dani het dr Olaf no id Telefonkabine verbannt und ne chli lo telefonidere. Isch auso scho no luschtig gsi sone riise Schneema ir Telefonkabine. Plötzlich hei die Tätscher-Froue gseit mir söue mou eis spile, was mir du de i Chliformation ou gmacht hei. Go out, Session, Mamaloo u so hei mir hurti gspiut. Plötlich si no 3 Schlagzüg vo de Tätscher derzue glüfe und hei Spontan ou no grad ghuufe. Jo när simer du würllich a Bahnhof abe und hei gwartet bis dr Umzug afoht.

Die meischte heisech bim Parkhusiigang versteckt wüus dert sones Vorrüümlü het gha, das jo grägnert het. Hät jo d Frisur chönne kaputt go verusse... ☺ Nei Seich mir hei chli glosst wie die angerer Gugg aföh spile bim Start und gwartet das mir dra chöme. Isch gar nid so lang gange het mi düecht. Trotz Räge simer verusse gstange und hei mitgshunklet wenn wider es Lied gspiut worde isch wo jo eh aui kennä.

So Nr. 15 vo 27, dass si mir. Agfange heimer mitem Lion. Und wie witer obe scho erwähnt die angere Umzugslieder hingedri gäh. ☺

Nachem Umzug simer no chli go si hei öppe no es Bierli trunke oder so und hei när no üser 3 Uftritte uf dr Bühni Mixed, ufem Chöifplatz (Houptbühni) und bim La Poste gha. Die si aui guet gange het mi

düecht. Bim letschte het me aber afe ä chli gmerkt, dass mir aufer nümme so möge. Aber es isch es glungnigs Wucheänd gsi. Het Spass gmacht und mir heis guet gha Zäme.

Nachem letschte Uftritt si mir go d Instrumänt ilade und mitem „Car“ wider hei zue. Wider gäge Hogger ufe go verlade. Während dr Bähndlifahrt düre Hoger het d Lies no e haubi Härzbaragge gha. Isch doch dr Chauffeur während dr Fahrt ufgstange! Hallo hei mir de ä Autopilot?!

Mir hei du när no z Frutige am Bahnhof stüu gha und si dert no go e Kebap ifreese. Auso nid aui aber es paari scho. Dä Cheib isch auso no guet gsi...

Dr Räschte vor Fahrt hei mir no chli brichtet. I ha es Problem mit mim Oug gha. Ha gäng eis müesse zue due dasi no ha chönne läse was ufem Display steit aber egau.

Es isch gaaanz es superigs Weekend gsi mit euch aune. Danke das mirs so luschtig hei gha trotz em eher mässige Wätter.

Dir sit aues geili Sieche!

Es isch geil e Gaugesumpfer z si.

01.02.2016, Ste Schär